

JISAS
bin dai
en imbin
gidap
laibala igin



Kriol



Afta na wen deibin dagadagat sapa, Jisas bin gajim det daga, en imbin gibit theingks langa God, en afta imbin breigim det daga, en imbin gibit det daga langa im wekinmen olabat, en imbin tok, "Yumob dagat dijan daga, dumaji dijan daga main bodi."

Afta na imbin gajim det kap garram wain, en imbin gibit theingks langa God, en imbin gibit det wain langa im wekinmen olabat, en deibin dringgim det wain, en Jisas bin tok, "Dijan wain yumob dringgim im main blad. Ai garra spilim main blad blanga ebribodi blanga opinimap det nyubalawei blanga God."



Brom deya Jisas bin go nomo longwei brom detlot thribala wekinmen, en deya na imbin buldan garram im feis langa graun, en imbin prei langa God blanga deigidawei det trabul brom im.

Imbin prei, “Main dedi, ai sabi yu gin dum enijing yu wandim. Wal yu nomo meigim mi dai. Bat yu nomo dum wanim mi wandim. Yu garra dum wanim yu wandim.”

Mak 14:35-36



Wal wen Judas bin kamat deya, streidawei imbin go langa Jisas, en imbin tok, "Titja!" En imbin kis langa im, en detlot pipul bin grebum im, en deibin holdim im adbala.

Afta na Jisas bin tok langa detlot pipul, "Mi nomo trabulmeika. Wotfo yumob bin kaman garram naif en stik blanga grebum mi? Ebridei aibin oldei titjimbata yumob deya langa det Serramoni Pleis. Wotfo yumob nomo bin grebum mi deya? Ai dalim yumob wotfo. Yumob nomo bin grebum mi deya, dumaji God bin tok langa oltestaman dijan ting garra hepin lagijat na." Wal ol detlot wekinmen blanga Jisas bin ol libum im na, en deibin ol ranawei.



Bambai na wen imbin dinataim, det san bin go dakbala, en det kantri bin jidan dakbala raidap aftanun kabaditaim, en wen imbin aftanun kabaditaim, Jisas bin jingat adbala garram im ron langgus, “Ilai, Ilai, lama sabaktani?” Detlot wed im tok, “Main God, main God, wotfo yubin libum mi?”

Wal Jisas bin jingat adbala wanmo, en afta imbin dai.

Wal det boswan solja hubin jandapbat deya wotjimat detlot kros bin luk hau Jisas bin dai, en imbin tok, “Trubala dijan im san blanga God!”

Mak 15:33-34, 37, 39



Wal wen detlot gel bin kamat langa det greib deya, deibin luk det bigwan ston nomo bin deya langa det dowa, en deibin gowin insaid langa det keib, en deibin luk wanbala yangboi deya. Det yangboi bin werrimon longwan waitwan klos, en imbin jidanbat raidensaid langa det keib.

Wal det yangboi bin tok langa olabat, "Yumob nomo bradin. Ai sabi hu yumob lukabat. Yumob lukabat det bodi blanga Jisas brom Nesareth. Imbin dai langa det kros. Bat imbin gidap laibala na. Yumob luk det pleis weya deibin pudum im bodi. Im nomo deya. Wal yumob go en dalim detlot wekinmen blanga Jisas."

Melabat bin reken God bin panishim im wen imbin abum detlot trabul en pein. Bat najing! Imbin abum detlot trabul en pein blanga melabat. Dumaji blanga melabat nogudbalawei deibin beldim im, en gibit im loda pein langa im bodi. Imbin deigim det panishmen blanga melabat en imbin meigim melabat jidan brabli gudbalawei.

Aisaiya 53:4-5

Scripture from **Kriol Holi Baibul**
© 2007 Wycliffe Bible Translators, Australia



**BIBLE
SOCIETY**

Live light

Artwork by Darren Farrell
Minyerri, Northern Territory

Published by Bible Society Australia © 2012
www.biblesociety.org.au